

**Proxecto de Decreto ...../2011 polo que se actualiza o Catálogo galego de especies ameazadas e se modifica o procedemento de catalogación, descatalogación ou cambio de categoría de especies**

A Comunidade Autónoma de Galicia, co obxecto de aplicar medidas específicas de protección para as especies ameazadas, aprobou mediante a Lei 9/2001, do 21 de agosto, de conservación da natureza a creación do Catálogo galego de especies ameazadas.

O dito catálogo regulouse, mediante o Decreto 88/2007, do 19 de abril e nel estableceuse o procedemento de catalogación, descatalogación ou cambio de categoría dunha especie, previsto para cando exista información científico-técnica que así o aconselle.

De acordo con este Decreto, cando o obxecto do procedemento sexa a inclusión ou exclusión dunha especie no Catálogo galego de especies ameazadas, a resolución do mesmo se realizará mediante Decreto do Consello da Xunta. Asemade, o dito decreto establece que a dirección xeral competente en materia de conservación da natureza incluírá directamente no Catálogo galego de especies ameazadas a aquelas especies que foran previamente obxecto de catalogación no Catálogo Nacional de Especies Ameazadas.

Posteriormente, mediante o Decreto 260/2007, do 13 de decembro, creouse o Observatorio galego da Biodiversidade como órgano colexiado de asesoramento e consulta en materia de conservación da biodiversidade de Galicia, incluíndo entre as súas funcións o informar á dirección xeral competente, sobre a catalogación, descatalogación e cambio de categoría de ameaza das especies de fauna e flora no Catálogo galego de especies ameazadas.

En data 5/3/2008 solicítase a instancia da Asociación para a Defensa Ecolóxica de Galicia a catalogación de *Quercus lusitanica* no Catálogo galego de especies Ameazadas, solicitude que é informada favorablemente polo Observatorio galego da biodiversidade, na súa sesión do 25/9/2008. Visto este ditame, e tras elaborar unha Memoria Técnico Xustificativa, a Dirección Xeral de Conservación da Natureza resolveu, en data 17/4/2009 proceder á catalogación da poboación do monte Pindo de dita especie dentro da categoría Vulnerable.

Por último, en data e 4 de febreiro de 2011, aprobouse o Real decreto 139/2011, do 4 de febreiro, para o desenvolvemento do Listado de Especies Silvestres en Réxime de Protección Especial e do Catálogo Español de Especies Ameazadas, creado mediante a Lei 42/2007, do 13 de decembro, do Patrimonio Natural e da Biodiversidade, no que se inclúen novas especies que contan con presenza en Galicia dentro das categorías de ameaza, e que non figuran incluídas no Catálogo galego de especies ameazadas.

O Catálogo galego de especies ameazadas estableceuse como instrumento para a protección da biodiversidade que debe de ser dinámico dando resposta á información dispoñible sobre o estado de conservación das especies. Neste sentido a inclusión ou exclusión dunha especie mediante Decreto non se amosou como un procedemento suficientemente áxil para actualizar a catalogación das especies, sendo a aprobación

mediante Orde da consellería competente en materia de conservación da natureza un procedemento con suficientes garantías legais e máis áxil na súa tramitación. Por outra parte, esta figura móstrase máis coherente para lograr unha actualización paralela do Catálogo galego e o Catálogo español de especies ameazadas, xa que a Lei 42/2007, do 13 de decembro, do patrimonio natural e da biodiversidade no seu artigo 55.2 establece que a inclusión, o cambio de categoría ou a exclusión dunha especie no Catálogo Español de Especies Ameazadas, levarase a cabo directamente polo Ministerio competente.

Este decreto ten por obxecto actualizar a lista de especies incluídas no Catálogo galego de especies ameazadas así como modificar o procedemento para a inclusión, cambio de categoría ou exclusión dunha especie no mesmo, que levarase a cabo mediante Orde da consellería competente en materia de conservación da natureza.

Na súa virtude, tendo en conta as consideracións que anteceden, a proposta do Conselleiro do Medio Rural, oído/conforme co ditame do Consello Consultivo de Galicia e logo da deliberación no Consello da Xunta de Galicia, na súa reunión do de de dous mil once,

#### DISPOÑO:

**Artigo Único- Modificación do Decreto 88/2007, do 19 de abril, polo que se regula o Catálogo galego de especies ameazadas.**

O Decreto 88/2007, do 19 de abril, polo que se regula o Catálogo galego de especies ameazadas, queda modificado como segue:

Un. O artigo 9 queda redactado do seguinte modo:

*“Completado o expediente, realizarase a inclusión, exclusión, ou o cambio de categoría dunha especie xa catalogada previamente no Catálogo galego de especies ameazadas, mediante Orde da Consellería competente en Conservación de Natureza, a proposta da dirección xeral competente na materia”.*

Dous. O Anexo II relativo a Taxóns e poboacións catalogadas “VULNERABLES” modifícase do seguinte xeito:

Engádense no Anexo II os seguintes taxóns:

Plantas superiores	
Código	Taxón
194.	<i>Quercus lusitanica</i> Lam (poboación do monte Pindo)

Moluscos	
Código	Taxón
195.	<i>Charonia lampas</i> L.

Artrópodos	
Código	Taxón
196.	<i>Oxygastra curtisii</i> (Dale)

Aves	
Código	Taxón
197	<i>Pandion haliaetus</i> L.
198	<i>Phoenicurus phoenicurus</i> L.

Mamíferos	
Código	Taxón
199	<i>Nyctalus noctula</i> (Scherber)
200	<i>Nyctalus lasiopterus</i> (Scherber)

Disposición Derradeira

Este decreto entrará en vigor aos vinte días da súa publicación no Diario Oficial de Galicia.

Santiago de Compostela, de de de dous mil once